

Visoki predstavnik produžio mandat Visokih sudskih i tužilačkih vijeća na zahtjev premijera Terzića

U pismu koje je jučer uputio visokom predstavniku, premijer BiH Adnan Terzić je zatražio produženje privremenih zakonskih odredbi o tri Visoka sudska i tužilačka vijeća (HJPC) kako bi se "izbjegao vakum koji bi mogao imati štetne posljedice za proces reforme pravosuđa." Kao odgovor na ovaj zahtjev, visoki predstavnik Paddy Ashdown je danas uključio tehničke izmjene i dopune u zakone o Visokim sudskim i tužilačkim vijećima kojima se produžava mandat ovih Vijeća u njihovom postojećem prelaznom obliku do 31. maja 2004. godine.

Glavni zadatak ova tri Visoka sudska i tužilačka vijeća tokom njihovih prelaznih mandata je bio da izvrše ponovno imenovanje približno 1000 sudija i tužilaca na ove funkcije na osnovu kvalifikacija i u skladu sa nacionalnom zastupljenošću prema popisu stanovništva iz 1992. godine. Ovaj proces ponovnih imenovanja je gotovo okončan ali zakon kojim će se uspostaviti trajno, neovisno Visoko sudsko i tužilačko vijeće za cijelu BiH, iako su ga usvojila entitetska zakonodavna tijela i Vijeće ministara BiH, još mora proći parlamentarnu proceduru u Parlamentu BiH. U praksi, uspostava Visokog sudskog i tužilačkog vijeća BiH će predstavljati spajanje tri postojeća Visoka sudska i tužilačka vijeća.

Visoki predstavnik je poduzeo ovu mjeru budući da će ova Vijeća i dalje biti odgovorna za vođenje disciplinskih postupaka protiv sudija i tužilaca, te za vršenje imenovanja kako se budu pojavljivale upražnjene pozicije u pravosuđu. Nadalje, međunarodna finansijska pomoć ovisi o kontinuiranom

radu ovih Vijeća.

“Jačanje pravosuđa usvajanjem zakona kojim će se uspostaviti jedinstveno Visoko sudsko i tužilačko vijeće predstavlja jedan od 16 uslova koje BiH mora ispuniti prije nego Evropska komisija uđe u pregovore sa BiH vezane za Sporazum o stabilizaciji i pridruživanju,” izjavio je danas visoki predstavnik. “Jednostavno rečeno, proglašavanje ovih izmjena nije opcija”. Visoki predstavnik je dodao da “je važno da Parlament BiH iskoristi ovu priliku kako bi pokazao svoje opredijeljenje za Evropu i vladavinu zakona u BiH. Nedavna kampanja usmjerena protiv neovisnog procesa imenovanja u pravosuđu i naročito Visokih sudskih i tužilačkih vijeća dovela je u pitanje povjerenje međunarodne zajednice u vezi sa time da li BiH istinski podržava temeljni princip neovisnog pravosuđa. Na Parlamentu je da pokaže da BiH podržava ovaj princip.”

Mandat Neovisne pravosudne komisije se danas završava. Od sutra, 1. aprila 2004. god., odjeli postojeće strukture ove Komisije će služiti kao sekretarijat za tri Visoka sudska i tužilačka vijeća do uspostavljanja jedinstvenog Visokog sudskog i tužilačkog vijeća. Ovaj sekretarijat će nastaviti da služi kao sekretarijat jedinstvenog Visokog sudskog i tužilačkog vijeća BiH, koje će preuzeti aktivnosti postojeća tri Vijeća, kako bi se osigurao neometan prijelaz.

Iskazujući pohvalu direktorici Neovisne pravosudne komisije, Rakel Surlin, i osoblju ove Komisije, visoki predstavnik je danas izjavio, “Neovisna pravosudna komisija je započela sa radom 14. marta 2001. god. i bila je agencija koja je predvodila reformu u oblasti pravosuđa u Bosni i Hercegovini. Ona je davala podršku radu Visokih sudskih i tužilačkih vijeća u reizboru svih sudija i tužilaca i restrukturiranju sudskog sistema. Neovisna pravosudna komisija je bila od ključnog značaja kada su u pitanju mnogi aspekti reforme pravosuđa, uključujući reformu ključnih procesnih zakona koji su na snazi u BiH i njenim entitetima”.